

Loiolako Liburutegiko zati bat jasoko du Inazioren Liburutegiak

Loiolako Liburutegian 132.000 liburu daude eta horietatik 6.500 inguru San Inazioren ingurukoak dira

Inazioren Liburutegiak jasoko duena Loiolako Liburutegian dago jasota gaur egun. San Inazioarekin lotura duten 6.500 liburu inguru hartuko ditu Inazioren Liburutegiak: Jesulagunen Konpainiarenak, San Inazioren biografiak, autobiografiak, gogo-jardunak, lan osoak, epistolarioa...

Uztarria Azpeitiko Herri Aldizkariaren 2007ko abenduko zenbakian adierazitakoaren arabera, 132.000 liburu daude erregistratuta Loiolako Liburutegian, eta 10.000 artxibo. Horien guztien artean daude jasota Inazioren Liburutegia osatuko dutenak ere. Baina, orain, Gipuzkoako Foru Aldundiko Diputatuen Kontseiluak hartu duen erabakiaren ondorioz, laster toki berria izango dute San Inaziorekin lotutako liburuak: Granada Egako Dukearen etxea zena.

Eduki zaharrenak Loiolan

Loiolako Liburutegia eta Artxiboa, aurrez aipatutako Uztarria aldizkarian aipatzen denez, 1997ko uztailaren 24an inauguratu zituzten ofizialki eta jendearentzako orduko urrian zabaldu zituzten. Eduki zahar gehien jasotzen duen Euskal Herriko liburutegia da Loiolakoa: 1.500 urte aurrekoak diren 37 lan jasotzen ditu eta 1900. urte aurrekoak 40.000 inguru.

Loiolako Liburutegiko fondoetako bat San Inazioaren ingurukoa da, baina bestelako gaiak jorratzen dituzten lanak ere badaude: Liburu zaharren atala, Euskal liburuak, XX. eta XXI. mendeak eta musika.

Loiolako artxiboan, 10.000 lan dituzte erregistratuta eta tartean San Inazioren ingurukoak ere badaude. Uztarria-n esaten denez, fondo hauek ditu artxiboak: San Inazio eta bere familia; Loiolako Santutegiaren artxiboa; Jesulagunen Konpainia; Historia zibila eta Gipuzkoako Familien artxiboak.